



Aqqalu C. Jerimiassen

UKA 2025/163-1

Atassut

22. Oktober 2025

Nunatsinni atuarfinnut namminersortunut aningaasatigut tapiissuteqartannginnissamut Naalakkersuisut inatsisissatut siunnersuummik suliaqaqqullugit Inatsisartut aalajangiiffigisassaattut siunnersuut. Inatsisissatut siunnersuut kingusinnerpaamik UKA2026-mi saqqummiunneqassaaq.

(Inatsisartunut ilaasortaq Kuno Fencker, Naleraq)

Angajoqqaap kialluunniit pisinnaatitaaffigisariaqarpaa meeqqani atuarfimmi namminersortumi atuartikkusunnerlugu nunatsinniluunniit kommunit ingerlataanni meeqqat atuarfiini.

Meerartattalu siunissaasa qaamasuunissaat qaqagukkulluunniit tamatta partiini sorlermiikkaluaruttaluunniit qaamasuussasooq maani inersuarmi kissaatiguarparput.

Illimaginngilluinnarparalumi meeqqatta atuartitaanerata ajornerusumik inissisimalernissaa siunertarisaripput inersuarmi maani qinikkatut sulisuusugut, taamaassaguttami ajussaqaq.

Siunersuulli maannakkumut assut ersernerluppoq, tassani eqqarsarnarluni suna siunertarerpiarlugu uani siunnersuuteqartoq siunertaqarnersooq.

Tassami uani tapiissuteqartarnerup unitsinneqarnissaa siunertarineqartillugu paaserusunnarmat sunamita tapiisarneq qanoq ilusilik peerumaneqartoq? Tamaat tassa atorunnaarsinneqavikkusunnersooq meeqqat nunatsinni pisortat pigisaasa avataatigut atuarfeqarsinnaatitaaneq?

Nuuk tassaavoq nunatsinni illoqarfiit pingaarnersaattut inissisimaannarani inuttussutsimigulli illoqarfiit arlaannaanulluunniit allaamut qanillattunngitsoq.

Inuttoriartuinnavinnermigullu nutserifigineqartuarnermini atuarfeqarniarnikkut unammilligassai imaannaanngivillutik. Taanna sulii maanna naleqqakkut artornarnerulersikkusussimaneramikku?

Imaluunniit siunnersuuteqartup nammineq arlaatigut atuarfik taanna misillerfiginikuusimaneramiuk taamannak kinguneqartinniarsarinerpaa?

Atuartut 200-jupajaajusut, taakkunannga tapiissutaasartoq peerneqarpat atuartut 20-innanngussappata Naleqqakkut meeqqat sinneri 180-iusut sumiiffissaanik aaqqissuussiffigereersimaneramikkit, imaluunniit pilersaaruteqareernerpat?

Pilersaaruteqassappata pissanganarumaarpoq qanoq iluseqartinneraat, atuarfissameernermi taamak nuummi annertoreertigisoq, pinngitsooratik meeqqat atuarfeqartariaqartilgassatik pilersaaruteqarfigisariaqassammatikkit.



Atuarfissaarsuassarsuaq (mittarfissuunngitsoq) Inussuk assut kinguaattooqqavoq, atuariit Nuup illoqarfittaata iluaniittut kataapput, atoqqittussaannngisaannaraluarlutimmi ingutsernissaminnut naammatseereeraluartut, sanaartornikkut pilersaarusionerullunerujussuup kinguneranik sulii pinngitsaaliissummik atorneqarniaraluartoq, taamaattoq peqqinnannginnerujussui pillugit matuneqartaleneri tusartalerparput.

Taava sooq maanna atuarfissameerneq taamak annertutigitiillugu, sulii namminersortunut arlaatigut tapiisariaatsinik annertusaasinnaanerluunniit eqqarsaasersuutigiinnassanngilarput? Meerartatta siuariartuutigisinnaasassaannut kinguneqartussat periarfissiissutit ajunngitsutut isiginiartigit malersugassatuunngitsoq.

Taamaattumik taamatut Atassummiit oqaaseqarluta, siunnersuut itigartiillugu ilusimisut isikkoqarluni aappassaaneerneqarnissaanut innersuupparput.